

D'r Louis und Aes

Fasnacht



1927

1. Uffem Sey- und Anggemärt
Isch au 's Kuehfleisch sehr bigährt,
Dert kasch z'Nacht, wär wott's verbiete?
Vomene Maquereau 's Mentsch go miete.
2. Uff der Polizei goht's zue
Ass me Stoff het mehr ass g'nue,
Denn die mache täglich Sache
Ass me sich kennt krippelig lache.
3. Journalfiehler arbeitslos
D'Kinderwäge mien uff d'Stross,
In der Baiz wird Razzia g'macht
Und am Rhywäg g'schosse z'Nacht.
4. Und der Wiederhuser goht
Uff Paris in siner Not,
Will er do nit mache ka
Suecht er dert d'Olympia.
5. D'Nazizittig het sich g'sait
Lieber Irieh, ass gar nit g'freit,
Und het d'Fasnachtsnummere scho
Letschte Donnschtig use gloh.
6. Denn es goht halt doch um's Gäld
In där sindhaft scheene Wält,
Und wenn's B'richthus vorhär kunnt
Ka sie goh mit ihrem Schund.
7. D'Muschterg'nosseschaft het Ball
Doch sie bringt e b'sundere Fall,
Esel, Biffel, Hiehner, Gnu
Gänn sich dert ihr Rendez-Vous.
8. Noch em Oriänt isch gange
Unsere Edwin voll verlange,
Si Assyrerbart goh zaige
Ob sie dert no scheeneri haige.
9. Und am Musikfescht isch's gange
Wie wenn ain der Alt will fange,
Musikfescht am Fescht isch z'digg
Feschtverein das bricht der 's Gnigg.
10. Es mecht emol e Grossrotma
Charfritig ame Samschtig ha,
D'rum isch der erscht August am Rhy
S'letschtmol au erscht am zwaite gsi.
11. Wäge Staatsbeamtelehn
Wo jetz wieder besser stehn,
Sott das Manko naime use
Aber niene will me huse.
12. Statt das Gäld e bitzli z'stregge
Mien die Grossreth um's verregge,
Fasnachtdonnschtigsitzig ha
Wenn au pfluust der hinderscht Ma.
13. D'Schtrasselampe sott jetz spare
Was der Spinneschiffahrtskare,
G'fahre het in Drägg und Sumpf
Lampe spare isch jetz Trumpf.
14. Uns isch d'Finschteri wie g'macht
Uff der Strich goh muess me z'Nacht,
Wär am beschte zahle ka
Darf das Mentsch e Zytlang ha.